

遜

學

齋

文

鈔

遜學齋文鈔目錄

卷九

林輯甫惜硯錄跋

須碁課誦圖跋後

倭良峯先生莎車行記書後

恭親王幽風詠跋

書方夫人節孝事略後

書項儿山舅氏止齋文集校本後

吳桐雲孝經古今文傳注輯論跋

書雲松巢集後

跋張虎文父子詩集後

跋謝坦齋詩文集後

董比部所藏亭林先生大像跋

書王顧齋西山游草後

杜清獻集書後

遜學齋文鈔卷九目錄

書袁端敏公年譜後

書袁端敏公上科爾沁親王書後

王定甫詩跋

遜學齋文鈔卷九

瑞安孫衣言劄聞

林輯甫惜硯錄跋

右惜硯錄三卷余友林君輯甫旣編其先大父觀察公集復取同時諸君子與觀察往來酬贈之詩文及其墓銘墓表別爲三卷綴之集後蓋觀察出處之跡交游之美與厯官聲蹟之可傳於後者具載於此宜其後人之不能忘也夫觀察以文學道義爲一時士大夫慕好引重如此而莅官所至皆有遺惠良法爲後世所稱道蓋非無本而然輯甫能以先德之所存網羅裒輯而不敢以忘則他日之立身爲政其求無作於先人亦可知已咸豐三年四月

須砥課誦圖跋後

須砥課誦圖者我友王子定父爲其實姊劉孺人作也定父自幼喪其父母孺人實撫而教之備勤勞焉定父旣成進士通籍官戶部卽爲是圖以致其思而自記之歲丙午假歸粵將迎孺人以養而孺人年且老不果來定父念不能忘歸京師後又爲數詩以書其後其言尤可悲古之君子以謂母生之父教之此人理之常也其不幸者往往賴有母教如世所稱韋逞陶侃之事至於定父乃獨恃其姊以成可謂尤不幸者也夫爲姊者有不薄乎父母之心而因不敢薄其弟爲弟者有不忘乎姊之心而愈不敢忘其父母而定父文章行治成就果如此是其不幸者皆無憾也定甫今者伏而思其父

母而已有終天之悲引領以望孺人而又在數千里之遠其
觸於目而震動於心獨圖書常常在也此則定父之愔哉

倭良峯先生莎車行記書後

道光之三十年

今天子初卽阼尙未改元方慨然有志

於天下之事以直言極諫風厲羣下一時承望意旨爭言用務往往立見施行而曾侍郎國藩呂文節賢基尤能言國家大體特蒙顯用又召起

先帝時建言御史陳慶鏞蘇

廷魁等令各赴闕天下蒸蒸向治矣當是時倭先生仁方爲大理卿上書言君子小人之辨及人主爲學之道甚備

天子爲之手詔褒答稱爲直諫蓋非徒人臣遭際之盛而

聖人憂勤惕厲虛已從善之見於初政者尤天下之幸也

及明年咸豐改元

天子用先生爲葉爾羌幫辦大臣葉

爾羌漢莎車王地去京師萬里幫辦大臣武吏而先生宿儒

介節宜在左右失職遠出人咸以謂可惜先生顧不以纖芥於心自陞辭出都比抵所部道塗次舍日爲之記其於山川形勢賢豪遺跡與夫風土謠俗民生疾苦之際凡有所觸卽筆於書所謂莎車行記是也先生至葉爾羌未久復上書言事甚切

天子以爲封疆大臣宜留心邊要朝廷事非所宜言又一年而先生得過去官矣及咸豐五年衣言以授書入上書房而先生以翰林院侍講在上書房授讀蓋先生之忠誠質直有以上結

主知雖偶遭擯棄而旋蒙錄用轉

益清近未嘗不嘆

聖天子之眷念諫臣未有已也然自

先生之出而嘗與言事諫臣如陳公慶鏞蘇公廷魁先後皆去朝廷呂文節殉事舒城曾侍郎督師江表至於今日心言

匡拂之風稍稍衰矣獨先生儼然在上書房與我輩五六人朝夕出入乾清門意常默默今讀先生是書益不能無概於予心云

恭親王幽風詠跋

恭邸取幽風七月之篇句爲之詩詩各四韻旣成以示衣言
衣言愛而讀之旣卒業喟然歎曰周公聖人成王周之令主
而當時所陳戒者皆野人婦子之言蓋人主深居九重使其
精神念慮之間嘗在於民則放僻邪恣之萌無自而生而天
下事無不可爲矣恭邸曰課一詩詞翰之美無以復加然獨
以謂此數十篇者其用心爲尤不可及也咸豐丙辰

夫人節孝事略後

今年夏予奉

命出守安慶始與歙王子懷侍郎相識將

行侍節以其先祖慈節孝方夫人行略見示命爲序述予謂
古來婦人之以節見其事多相同者至方夫人行不履人跡
不入其兄之室飲食人嘗下箸卽不復食不與人共金而舉
人皆謂其過甚以予思之誠爲養之法也夫人之所以流爲
小人之歸者其初皆非欲顯爲不韙惟於事之偶違於禮者
以爲無害我事而苟可以恕至於漸漬之久乃潰敗放軼而
不可收拾蓋人欲之所伏甚微不謹其小則必有其大者故
古之所謂中庸三代以上大賢可以行之若以中人之資當
人心惡薄之時則惟持之過激而後乃適得其平方夫人之

事人皆謂其已甚卽自夫人思之亦知其可以已而斤斤然必出於是者其用心爲甚微也嗚呼世之婦人不幸而爲嫠夫人之事可爲法矣抑余又有感焉余所見世之節烈賢母其子孫往往而賢否則必尊顯榮達蓋天之所以發揚苦行類如此而子孫之賢則尤貴焉侍郎由甲科爲部曹卽著清節至爲諫官恩卿貳言事切摯嘗以國事得失人才進退爲己憂旣而自知終不見用奉身以去無所係戀可謂終始無恨無愧夫人之子孫衣言之高祖母萬亦以節孝載在郡邑志自先曾祖至我父皆隱學不仕至表言兄弟始得列於朝廷而官念服官以來無一事可以無愧於心至於立身行己猶兢兢於不肖之虞詩曰無忝爾所生甚矣無忝之難也

予所以尤歎慕於方夫人而以爲不可及也

書項凡山舅氏止齋文集校本後

陳石士侍郎所刻止齋集予往嘗得之恨其訛缺欲求善本校補而未能今年客游安慶嘉興錢警石先生亦避地在此出侍郎刻本相示則我舅氏項凡山先生據先生所藏舊本校正者警石先生博聞君子多藏書亂後往往散去其嘗有校勘者幸皆攜以出而此集爲我家鄉先輩書又先舅氏之手澤可貴也舅氏篤學能文詞尤喜校書此爲咸豐癸丑去富陽校官寓居杭州時爲警石先生校者然缺訛亦未能盡補蓋所據舊本亦非宋槧原書也先生自言知我舅氏久而相見甚晚校此書後不久卽別去遂不復相見矣南宋時永嘉學者如薛士龍蔡行之葉正則與陳文節公皆我瑞安人

尤能通知古今治亂之故爲有用之學而陳公最爲醇博今日我鄉人士汨沒流俗能聞鄉先生之風興起爲學者蓋亦鮮矣而我舅氏家居亦黯默閉戶少與人通今舅氏卒五六年矣後生子弟鮮有知其可愛惜者獨予與警石先生相從羈旅中每一言及輒相向歎息也同治二年四月

吳桐雲孝經古今文傳注輯論跋

去歲七八月間桐雲自閩以所著讀易隨筆及孝經古今文傳注輯論寄示予於瑞安屬爲之序適予有杭州之役未遑暇也今陶冊臣司馬自蘭溪來復以孝經輯論見示云將刻而傳之於是桐雲以福建鹽法道移巡臺灣矣予謂魯論一書首教人以爲學之道其次章卽述有子之言以孝弟爲爲仁之本且以爲孝弟則不犯上作亂然則孝弟者教之始也今之爲民上者患在不學而爲民者苦於無教桐雲篤於學而臺灣道實兼學校之事雖曰海外强悍然予嘗爲桐雲言之矣曰治悍民易治柔民難桐雲誠推此書之意躬行以教之異日言臺灣之民易漳泉而鄒魯者必自桐雲始矣同治

丙寅五月紫陽書院跋

雲松集後

衣言頃從友人丁君丙假文瀾閣殘本求吾鄉先輩書僅得
止齋集浪語集雲松集集止齋集予故有之浪語集缺二十
餘卷惟雲松集集爲完書樂清朱先生希晦詩也其詩固已
清亮可誦然予觀其七世孫諫後序稱先生隱居瑤川不樂
仕進有田數十畝悉以入祠堂獨以所作雲松集一冊端硯
一方古本文選一帙付其五子曰汝可守此於戲先生高致
如此詩亦安得不佳哉今之人豈徒文辭可傳者少抑其自
得於心者不同也聞鄉先生之風可以慨然興矣其七世孫
諫者蕩南先生嘗爲郡太守有蕩南集未亂時予家亦有之
今其板不知尙在樂清否予同年徐惇士文而好義爲先生

鄉後學故以此書寄之庶并蕩南集刻而傳之同治五年八月書於紫陽書院

跋張虎文父子詩集後

松濤閣詩曰甌吟吳吟燕吟粵吟哀思百鳥吟者凡五種永
嘉張元彪虎文著柿園詩二冊不分卷數則虎文子正宰所
爲也虎文詩有張芸墅王西莊侯夷門諸序跋而正宰詩錢
唐袁簡齋爲之論定皆有推許語蓋虎文父子當時固以能
詩名者矣予考郡志循吏傳言虎文所著尙有家鑑而百鳥
吟顧無之柿園集則郡志亦未著錄殆脩志時正宰集尙未
出歟張芸墅序稱虎文詩假途漢魏接迹漢唐誠爲過譽獨
西莊言以性靈勝則近之矣而柿園集予亦恨其詞勝於意
蓋於詩皆未爲詣極然循吏傳稱元彪父式雷素多病湯藥
必躬調以進父患齒血出百治不效元彪呼天請代卽夕而

愈及其以拔貢爲海康知縣抵官日於城外飲陸公泉賦詩
勵志颶風爲災元彪請發倉廩及軍需銀以賑府持不可元
彪奮曰必待報可而後賑則我民轉溝壑矣專擅之咎某任
之不以累公卽賑如法所活數萬人尋以親老乞歸父卧病
不解衣帶者彌月父卒哀毀成膈疾然則虎文固孝子而良
吏也嗚呼天下文學之士務自繪飾爲名聲及其施之事爲
往往顛倒錯亂而無足觀而汨沒於貨利以自喪其守者皆
是也至於門內之行求其誠篤而無憾蓋益少矣如虎文之
行有本末又何必以文重而其文顧不愈重哉張氏永嘉望
族而虎文世居郡城松臺里郡選舉志有康熙壬午舉人張
式需式需子有乾隆丙辰舉人張元旭甲子舉人張元觀元

觀嘗爲國子助教亦能詩有頤齋集王西莊嘗爲之序而今
不可見矣虎文於頤齋爲從兄而虎文爲雍正己酉拔貢子
正宰副貢正寓拔貢蓋百年以來永嘉人士能以讀書科第
世其家者甚可慕也同治丁卯二月

跋謝坦齋詩文集後

先生名天埴字亦潛永嘉人康熙庚辰進士官終河南杞會
武陽令包京之孫也郡志循吏傳稱天埴爲文如行雲流水
而不言其有坦齋集包京兩雁山人集及天埴子直與可自
怡集郡志經籍皆著錄亦無坦齋集予頃以蒐探鄉先輩書
徐君莖生從其友張君處得此本凡詩古文及令杞時宦牘
文字都爲一帙末有事實一篇載其在杞政績而邑人去思
碑附焉集中文多近俗詩亦未爲深詣而沖和真樸處乃有
似元次山白樂天者志所謂行雲流水殆指其詩而言歟然
予觀去思碑所稱先是治杞者箕歛則有私派征糧則有重
糶供官則有行戶行市則有雜稅訟則有請託糧額則有

欺隱公愀然曰民瘠矣我不忍踵此以自肥也用是一切禁絕而志亦稱其丁外艱歸卒門下士至不遠數千里來祭然則先生豈欲以詩文名者哉碑又言其祖兩雁以名進士宰武陽多惠政邑人爲立祠五柳集其後復入河南名宦祠而今郡志兩雁顧列義行傳不言其宰武陽事則志乘之所遺者多矣兩雁集自怡集今皆未得見僅於徐君得見此本亦殘蠹損矣因爲擇其雅潔可誦者別爲一編錄而存之先生詩文雖非其至而祖孫先後繼爲循吏有惠澤於民如此則其文字不尤可寶貴也哉此本題曰謝坦齋集而去思碑言先生號尋齋皆郡志所未載也同治丁卯二月城南富廬

董比部所藏亭林先生大像跋

亭林先生小像卷在慈仁寺者顧氏家藏物此則洪洞董比部麟所藏朱埜雲筆蓋就小像展拓爲之其筆墨不及顧氏卷之精而儒重秀偉之氣令人肅然矣同治七年五月二十八日先生之生辰鮑子年侍讀集同人致祭於先生祠堂而比部亦移奉此像於慈仁寺之北堂同人皆得瞻仰焉先生之卒於今垂二百年而其遺兒之傳猶令人敬愛思辟咎請業於其旁而不可得蓋古之正人莊士其有遺思於後世類如此也於是同集者無錫秦炳文儀亭洪洞王軒霞舉番禺許其光涑文壽陽閻汝弼夢巖河開王應孚信夫樂平汪元慶泉孫無錫孫勳烈伯瑜天津徐士鑾苑卿丹徒戴燮元肖

鹽山劉淮煇星岑仁和王堃小鐵上元端木埰子疇涇陽
張師劬念慈瑞安孫衣言勤西及比部之弟文燦芸龕凡十
有五人而衣言復爲之跋

書王顧齋西山游草後

咸豐己未六月予自內廷出守安慶於是予友王定甫戶部
林穎叔工部皆直樞府恐予有失職漂搖之感思有以廣予
者約爲西山之游連騎至碧雲寺卧佛寺反碧雲宿焉夜深
人靜泉聲自後山來穿庭而出終夜潺潺不絕予與定甫穎
叔一燈相對各爲歌詩以爲笑樂予謂定甫穎叔曰我與若
徜徉乎此間則形骸固肱贅衣冠固桎梏也而一官之升沈
近遠又何足以云二君亦洒然自失然次日皆以事下山不
能極其幽勝矣又十年而予再至京師每望西山未嘗不思
碧雲寺也已而與故人王兵部霞舉相見霞舉出所作西山
游草以歸予則予所願游而未極者皆在其詩中予乃思碧

雲寺尤甚而又竊歎霞舉雖爲京朝官獨能飄然爲方外之樂異於世之影纓振轡逐逐塵中以自汨沒者予見霞舉而益不能無思於定甫穎叔也至其詩瑯琊奇偉則杜子美入蜀以後數百年無此作矣霞舉之友許起居海秋將刻而傳之子因書其後以還之時同治七年在袁氏居書於是予將南歸行與西山別矣

杜清獻集

卷四

往歲予在杭州。為黃巖王子莊蔡求杜清獻集。幾一年不可得。今春予與子莊先後至京師。而予同年御史錢樾庵桂森。官藏書。問以清獻集。樾庵有之。亟取以眎予。莊子莊喜甚。既手錄副本。因復求予。書其後曰。清獻當南宋理宗之初。崎嶇侵削之餘。民窮而財盡。兵弱而敵強。其勢固無可為矣。而清獻以疎賤新進。為國昌言。凡宮府內外。是非邪正。知無不言。言無不盡。其忠肝古誼。若必欲使宋易危而為安。易亡而為存者。而當時史臣。亦謂其五河之役。卒抗元兵。而邊將孟珙等。亦皆洗心聽命。則可謂用之而効矣。使理宗早聽其計。而鄭清之史嵩之等。羣小人不相齟齬。宋亦未嘗不可為也。然

則國家之勢苟未至如南宋削弱之甚顧一切置之弗爲或反恣肆酷烈自速其禍豈不可惜也哉古今數千百年亂亡之數可謂亟矣然其所以由治而至於亂由亂而至於亡則漢唐宋以來未嘗不如一轍余讀清獻之書所謂天命有德而或濫於私予天討有罪而或制於私情左右近習之言或溺於私聽土木無益之工或侈於私費至於言賄賂之弊則以謂旁蹊曲徑競致奔趨邊方帥臣黃金不行於反間而以刺探朝廷厚賜不優於士卒而以交通勢要而論臺諫之失職則又以謂迎合時好循默備位自壞紀綱徒塗耳目其言當時裊敗之若南宋爲尤甚者然試由宋上推之以至漢晉由宋下推之以迄遼金元其標季潰敗之政蓋未嘗不出

於所言豈天之將亡人國則必先奪其鑑耶抑人君徇於治
安習於淫佚戒懼之心日少嗜慾之蔽日深其顛倒亂必
至於是耶嗚呼豈不可危也哉然予以謂理宗之時宋雖已
危而猶有骨鯁幹略之臣如清獻者感慨憤激維持補救於
其間而理宗之於清獻雖其英斷不足以用之而始終敬信
亦誠有庸主所不及者使後世防危之際遂無清獻其人或
僅有之而擯棄摧抑惟恐不及則其取禍更何如耶此尤可
危之甚者矣嗚呼以清獻之賢當時之人至方之司馬文正
而清獻之自命亦實有不在文正下者文正當仁宗之盛卒
能以道輔成元祐之治利澤在生民威名震敵國而清獻當
理宗之世未能少究其用至於爲相僅八十日而薨人才之

幸不幸不能相強固如此耶而猶幸其遺書之存可以考見其深謀遠慮忠言苦口之大略使後世之人主知當無可爲之時苟得其人未嘗不可以有爲而獨患一切置之或恣肆酷烈以自速其禍也然則涓獻之書豈獨南宋一時之言哉同治戊辰書於京師

書袁端敏公年譜後

嗚呼自

宣宗皇帝之季至於咸豐庚申辛酉二十

間軍旅之禍可謂亟矣洪秀全發難廣西以祇神夷鬼之教驅脅死黨軼出桂管順流而下不半載破荆鄂據益陵南極閩嶠北驚帝畿而苗沛霖張隆張樂行以淮北七不無賴挾鄉里羣不逞之徒抗官剽劫禍亦挺於秦晉齊魯兩犯畿輔當粵賊之熾跨據江表建立名號盡有財賦之地幾成割據之勢疑非淮賊之所敢望然金陵窟穴用兵十年遂無噍類而苗張遺孽後七年乃滅何戎功之遲速殊耶則所以治之者有不同也昔者聖王之於民盡心焉爾矣爲之田里以贍之爲之庠序以教之爲之禮樂以養之其於吾民若惟恐拂

其性而傷其生也而其不率我教則刑亦隨之故有五禮以章德則曰天秩有禮有五刑以討罪則亦曰天討有罪皆所以奉天行事而非吾之有所私也兵者刑之大也刑以禁奸邪兵以禦強暴所謂天之事也後世教民之法一切盡廢固不知所以爲禮又其甚者至於刑不足以示警兵不足以示威夫至兵不足威則天之予我以權者幾無所施而天子奉天之事廢矣嗚呼其將何以振哉當粵賊之變合吳楚數省之兵竭天下之財力以攻一城其於三代之用兵不知何如而志在戡亂則猶先王用刑之意也至於淮賊之亂始有撫之一說而刑罰之權弛矣夫撫之爲說古人有用之者用之外國漢文帝之於冒頓宣帝之於呼韓邪是也用之中國張

喬祐良等之在交趾是也文帝之時漢之始興宣帝之時
帝兵威極盛之餘也張喬祝良之定交趾非頑民之好亂也
於州縣之虐而欲自救其生者也方興極盛之時彼固知我
之兵力足以滅之而有餘而民之逼迫於州縣則如嬰兒之
見苦於婢僕號呼以求慈母此固可以一撫定也使其爲天
下之亂民方謂我法之不足畏而夷狄方有輕視中國之心
乃欲苟且以出於撫之一說則其禍必不可救靖康建炎之
際李綱宗澤趙鼎韓岳諸將相皆可以有爲而宋之徽欽高
宗爲女眞所脅遂出於和阻江賊蓋亦屢撫而屢叛此其
效亦可覩矣無他漢之不肯用兵者仁愛惻隱之心也宋徽
欽高宗之議和曹文詔等之用撫畏葸苟且之計也出於仁

愛惻隱其用心可以屈夷狄感異類而出於畏蕙苟且則五
尺之童笑之夫豈徒如此而已哉忠義之氣君父之仇雖衰
亂之極而其蘊結於中者不能泯也吾不能用其所不能泯
而以畏蕙苟且之說倡之於上則於懷忠義以報君父者必
百計以挫之民知其氣之無可伸也斯亦已矣一旦有事而
有求於外受折挫之民則勢必無及夏少康以一成一旅而
中興宋徽欽席累世之業撫萬里之地而社稷移於一朝此
何故哉嗚呼豈不可危也哉夫粵賊之亂今日已無事矣使
其當長驅乘勝王師屢挫之時按兵不動僞爲求撫當時必
有墮其計中者則粵禍至今未已可也苗沛霖之初起卽盛
兵以折之其滅於咸豐三四年間亦決也治粵賊知其必出

於戰而於沛霖冀其或可以撫故其成功之不同遂至於此
皖北之亂吾所目擊也張隆張樂行之徒當時將帥皆謂苟
且可撫而賊不能隱忍以誤我旋撫旋叛幸而速滅沛霖以
陰狡之性介於官與賊之間者將十年當時之議且有以不
能急誅沛霖議公者及見公之章奏則知當時皖中兵食盡
操於某帥之手公孤軍疲乏力固有不得爲而其咎口以言
於上及密謀於楚帥以誅之者固策沛霖之必叛也其
後沛霖果叛果卽誅死蓋惟知賊之必出於叛則吾亦不能
不真出於戰真出於戰而已亦遂無不滅之賊嗚呼兵
者刑之大也天下事固有必出於戰者而謂可以畏蒞苟且
之見行之也哉

書袁端敏公上科爾沁親王書後

予編端敏公年譜既得盡見公之奏議復取其在軍中與同時大臣書徧閱之其與胡文忠公李忠壯公及今相國曾公書皆深得當時大計至讀所上科爾沁親王書謂王之威靈一時所仰關係全局安危不可輕試以損威又以王之初出欲移軍北路以輔之嗚呼何其料事之明籌慮之遠也夫當羣捻北犯河南山東震驚畿輔天子出親王經略之欲速滅賊耳而公以謂不可輕試吾顧謂其料事之明爲慮之遠者非謂王之不足以平賊而謂賊之不足以煩王也夫擒賊以閭巷無賴之徒以焚掠爲生以殺戮爲事其悍虐不足自固其苟且非有遠圖而其飄忽輕浮之性亦非可以兵家

之常理治也使其初起朝廷不誤於一切言撫之說誠得三
四悍將精騎一二萬人與之追逐索賊以殲使之不得休息
彼且土崩瓦解之不暇豈真能爲中原禍哉正王以肺腑之
親居藩翰之重自海上事起而忠誠果毅之効已爲中外所
共知庚申之變廟謨未有所定奸臣陰掣其權棄地利以
資敵國曠日持久以洩兵謀至於一蹶不振而豈王之過哉
朝廷以爲海上之事不復可爲遂出王以當狂寇而豈知王
之威望宜令之守不宜令之戰宜令坐鎮根本以爲深遠之
慮不宜令逐利遠出以求疆場之功也及王旣出山東蕩平
沛霖授首而王卒以身殉之此豈非所謂輕試以損威者哉
蓋公固慮之矣今日事變所趨如癰疽之據於腹心非針石

毒藥之所得施而有萬不得已之策焉一宜建藩遠藩以用東三省之勁兵一宜建藩雲代以撫內外蒙古之屬國此二藩者其形勢足以爲京師之護衛而其人之驍健趨捷亦敵國之所無也得親賢以樹虛名得忠誠果毅之大臣以求實効而國家磐石之勢隱然復有所託王之旣亡則無以爲股肱之寄矣此可爲痛惜者也至公所請移兵以輔王者其慮又有深焉蓋王之忠誠果毅人所不能及也而其短頗在於用人方王之用兵於直隸山東人皆知王之身先士卒也皆知王之絕遠貨財也而所部諸將則有擇便利而遺王以危者矣有通賂賄而借王以市者矣王之所謂腹心爪牙大抵期門羽林之俊耳士人則少矣通古今知大誼者抑又少矣

夫所謂豐沛子弟南陽帝臣豈非自古興王之資哉然當其
藉王氣之方盛同起患難之中閱歷險阻之餘其志氣清明
其精神淬厲固宜材之可用也至於富貴易而驕生居養優
而志惰而狃於曹伍習慣之見者又不知充之以問學開之
以師友則其才之秉天而特出者亦往往而難矣度主之用
之亦不過以爲平生游舊踪跡習熟豈真有聰明才力足以
當王心者哉國家之制八旗子弟皆爲設學所以培養世臣
爲萬年之慮至深遠也而其弊何以至於是耶而王顧不博
求以自助耶公旣爲書以詔王又言於天子欲移師以
輔王誠使公在左右其肯聽以中外仰望之身起蚍蜉蟻子
之賊也哉此吾所謂料事之明而爲慮之遠也夫國家之恃

世臣以爲禍福休戚之與共也而苟無學以成其材則所謂禍福休戚將有不暇與知者矣然則我之深感公書又豈獨爲王惜也哉

重談瀛海圖跋

同治乙丑仲冬予主講紫陽書院以冬至日來杭州而琉球
門人東國興奉其主命迓封京師後予二日至杭來以於書
院於是予與子祥別二十有二年矣初道光庚子疏以弟子
四人奉命入學予官國子監爲其教習者四年其後咸豐
丙辰門人阮宣詔勤院爲其國貢使至京師來謁於澄懷
賜園時予方官翰林直上書房子祥之來則予方奉諱家
居其勢無繇相見而三日之間先後皆抵杭州固非意料所
及而此後之再見與否則尤不可以豫期也始予爲教習嘗
有海客授經圖以紀其事一時士大夫題詠甚眾今旣與子
祥別乃復召工爲圖命曰重談瀛海以見人生離合之數皆

遜學齋文鈔卷九

五

有前定固有沮於咫尺之地而海外萬里之遙反若期之使會者此予與子祥之所不能忘也丙寅冬至遂更自記

王定甫詩跋

此予友定甫通政出都留別詩以寄趙給諫元卿者乙丑冬予在紫陽書院定甫假歸桂林過杭相見出以示余因索得之咸豐五六年間予直上書房定甫亦直軍機定甫每入直卽過予所居食筭齋談藝歡甚予與定甫皆不能與時俯仰定甫與人尤少所可意定甫卒以言事去官將出都定甫旣自爲詩元卿及諸君子復賦詩以惜其行儼然范希文司馬涑水去國時也可謂甚盛而定甫方欲爲廣州之行予甚欲尼之謂定甫曰如定甫者異時豈可不爲國家之用然益當甯心志遠勢利若少有不慎則此詩及元卿諸公之作何以自信於後世哉定甫頗以爲然出此見贈而別書以寄元

卿元卿名樹吉亦予同年爲諫官有聲尤深於詩送定甫詩
三章尤人所難言也丁卯七月之望

遜學齋文鈔目錄

卷十

跋黎刻水心先生文集 跋今本水心文集

跋錢樾菴所藏抄本杜清獻集

跋邵員外手書詩冊三首

跋翁叔平庶子所藏寫本許及之集

跋劉練江先生會試硃卷後

跋丁中丞所藏劉給諫集抄本

跋陸存齋所藏抄本浣川集

跋抄本戴文子浣川集

跋固始周南屏鐵衣吟草

霽山詩跋

書孫歡伯大令母王宜人行述後

跋懷仁聖教序

跋曹文正公自書所作詩後二首

元祐五年陸松書達摩論經卷跋

沈樞仙巖題名拓本跋

書王阮亭古詩選後

書海峯姬傳所閱古詩選後

書姬傳先生今體詩鈔序日後

題祝京兆草書卷

書張敬堂所藏漢唐帖後

跋曾文正公書勤廉敬恕四大字後

跋文正公書杜詩後

跋畫梅花

書姚慕庭詩後

兩烈婦碑跋

題馬生其昶文卷

書程琢堂詩後

書郭慕徐芹曝錄後

書王秀峰時文後

雉舟酬唱集跋

書玉山草堂集後

書周忠毅公墨迹遺卷後

跋抄本吳彥匡花史後

書劉炯甫詩後

遜學齋文鈔卷十

瑞安孫衣言劭樹

跋黎刻水心先生文集

水心集陳氏書錄解題不著錄者二本一本二十八卷拾遺一卷一本無拾遺陳所稱淮東本也二本今並不傳此正統戊辰章貢黎諒公允爲處州推官時所刻本自言幼時嘗讀先生策場標準集及官括訪求遺集所得曰文粹曰葉學士集曰水心先生文集合之所謂標準者其總目有四而自爲編次爲二十九卷其所著經傳子史編爲後集總名曰水心文集然則明時先生傳本尙不止一種而公允重刻輕爲變亂又不能標別其文之原在何集使後人略識舊本梗概此

爲可惜然觀所載宋趙汝讜序謂集起淳熙壬寅又曰一用
編年則先生集汝讜所編者實以年爲次而公允所稱前三
種何者爲汝讜編年集今亦無可考又嘗見黃東發曰抄有
讀水心文一卷所錄目次與此本迥異然亦分類豈宋時所
傳二本之中固有分類之一本耶抑趙蹈中序所謂編年者
特於分類之中略寓編年之例耶惜不得宋本一覈之也此
本卷首標題皆曰水心先生文集其下皆有前集二字蓋以
別於後集似公允已并後集刻之然後集他無所見而予嘗
得水心別集十六卷習學記言五十卷皆藏書家寫本別集
多論時事今閱有見於此集者又有讀經史諸子二卷而公
允訪求先生書時不言有別集則公允或未之見抑明人剽

取議論之文以便科舉而更目之曰策場標準耶未可知也
至自學記言實皆考論經傳子史之詞而公允採書時不言
有此則亦未見其書矣水心先生之文在南宋時最爲世所
推服幾與歐陽蘇氏比並而其門人編定之本至明時卽爲
人所竄亂文字之獲傳於後誠難矣哉予求公允刻本數年
未得前歲在杭州借得丁君松生藏本亦殘缺今於同年錢
侍御桂森所見此本獨完善乃以所藏乾隆閒葉氏後人刻
本易之以歸蓋汝讜編年集旣不可見黎氏此刻乃獨爲舊
本也戊辰七月京師袁學士寓居

跋今本水心文集

此本刻於乾隆乙亥學使雷憲副鉉得黎氏殘本於葉氏
人以屬教授王君執玉爲求善本重刻之其卷帙篇第一
黎氏之舊而易其卷首標題曰水心文集去下方前集二字
又黎本有總目此本有子目爲小異而黎氏本其自跋下
字系於趙序之後字亦略小蓋以示謙而此本乃悉如其舊
爲非是至集中銘墓文水心往往自書作文年月於篇末此
本開脫漏趙師譚墓銘則竟削去之蓋以師譚小人水心不
宜予以文耳然刻古人集固不宜輕有所棄而以水心意氣
之盛自處之高師譚又同時誠使其才能政事一無取水心
必不諛之以文且雞鳴狗吠之事周密齊東野語固謂其以

撻武學生怨家構成之非事實然則師譴固不若是之甚也而又何嫌於水心之文哉今此板尙存葉氏予去年在紫陽書院嘗攜一本置行篋中因從丁君內借黎本校之補正百餘字今年在京師復於厥肆購得一今本而同年錢樾庵侍御乃有黎氏本予以爲此我鄉先生書請以今本易黎本侍御不予靳也乃書數語以歸侍御戊辰七月望後一日夜二鼓

跋錢樗菴所藏抄本杜清獻集

杜清獻集予在杭州求之二年不能得今年至京師求之嚴
肆亦無有以問同年錢侍御樗庵樗庵有之亟假歸屬台州
友人王子莊蔡爲副墨圖刻之台州而以此本反錢氏清獻
在理宗時常以司馬文正公自命而其時人亦比之文正今
觀其立朝議論與夫措施政事之大體其恢廓俊偉視文正
誠爲無愧而卒無救於宋之亡何也嗚呼自古及今何嘗一
日無才而遇與不遇士亦豈能自主哉

跋邵員外手書詩冊三首

位西員外詩二十一篇道光己酉手書以詒方君勉甫
豐戊午予直書房居澄懷園勉甫以相示予爲題詩其後
忽遂十年矣道光二十一年予初至京師位西與予同氏
項凡山先生皆以博聞好古相愛故予知位西最早然方以
從事科舉未敢親位西及道光之季予與王定甫戴存莊輩
稍稍爲古文詞時一見位西然終不敢以所作示位西而位
西頗知予其賀予入翰林詩極良友鐫切之意蓋相愛甚至
也初位西以中書直軍機處歷刑部員外郎深識偉論往往
驚其儕輩朝廷出宰相經略廣西位西決其十不可語尤駭
人大臣某惡之會河工需人卽以位西名上位西得東河而

位西母已老遂奉以如工次已而粵賊渡河北犯遂言位西
守不力鑄二級罷去位西飄然歸矣咸豐己未予由安慶引
疾歸位西在杭州未能一相見明年杭州陷位西遂及於難
位西自重守古誼固宜與流俗不相中而天之阨之顧亦如
是哉今年春予重至京師見勉甫問位西詩勉甫復出此而
予至不忍視雖然位西雖遭寇亂死然竟能以名節自完可
傳於後世而當時所謂大臣擠位西以至於死者今亦果安
在哉嗚呼此不足爲位西憾矣獨以予之無似承位西相愛
之深而自顧無所樹立猶多有愧於位西之言此可歎也戊
戌七月十八夜半書於雙樹齋

凡詩三十有四篇位西自書以貽沈尙書者今亦爲勉

甫所藏位西既沒於賊中其平生所爲文字遺稿皆不得見
亂後其友今相國湘鄉曾公張君鼎高君均儒真繁君
得十之一二今可見者儀禮通論上卷古文三十餘篇與仲
宜龍府刻之淮安其讀書日記所謂枕行錄者丁君丙刻之
杭州而予所見尙書大意遂不可得詩則僅此二冊及別紙
草稿不及百首頃聞朱修伯學士云亦嘗得其一冊有詩十
餘篇又勉甫言其友人處亦尙有詩十餘篇大約百餘篇而
已予於位西所著書最服其說禮之精博而詩古文之雅潔
超遠自梅先生伯言孫侍讀鼎臣外未見其比天旣不能使
竟其學而其書又幾於無傳此可歎也古之文人如歐陽永
叔王介甫皆極遭遇之盛韓退之柳子厚李習之歸熙甫之

徒雖坎軻抑塞未能盡其用而文字之可垂於後者固具在也而位西所遇如此然則士之抱道續學欲託文字以自存者亦必視乎其世哉

別紙七言律詩三十首蓋位西感事之作其云紫虛道人邯鄲題壁者寓言也又一紙七言古詩三首有伯言先生湘鄉相國評隲語皆手書相國論詩之謹於此可見而前輩朋友之相愛好主於直諒鏘切而不苟爲諛亦殊非後人所及矣予旣得位西遺詩欲爲刻之而未暇一日以語潘侍郎伯寅侍郎慨然任之因各書數語以歸勉甫俾爲別寫副本致之伯寅位西詩或不至於遂無傳矣七月十九夜半

跋翁叔平庶子所藏寫本許及之集

許深甫涉齋集十八卷四庫全書據永樂大典舊題許綸考
定爲及之作援據甚確而疑及之初名綸其後更名或與未
及詳今按集中有綸子以筠名齋詩又有與盧次夔直學投
贈詩云盧之父有師法方訓長孫鑄而次夔近繹子屈致教
參孫發蒙綸繹皆從糸旁蓋以偏旁聯名則綸固及之子也
宋元人編輯文集往往但題某官某先生集而繫編者姓名
於其次此集必許綸所編明人錄詩時未及深考因以爲綸
作而校修四庫書者亦沿其誤耳四庫書目言宋菑文志涉
齋集三十卷涉齋課稿九卷焦竑經籍志許右府涉齋集三
十卷此必宋刻舊題今撫拾殘牘編爲十八卷蓋視菑文志所載已

缺其半故但有詩而無文然在南宋吾鄉諸先輩中傳詩之多亦無過於深甫者矣四庫書目又言其爲詩瓣香王安石氣體高亮遠過江湖詩派之刻畫瑣碎今按其所作七言古詩用意妙遠者幾非後人所能驟然領略其他古詩亦皆排奡峭厲在南宋詩人中當爲健者不但超越江湖一派惟近體詩篇幅淺狹殊乏深意則所謂下筆稍易者耳此集僅有四庫本今年予在京師居南橫街同年袁筱鳴學士所與翁叔平庶子同巷偶屬庶子覓鄉先生集庶子以此集見示蓋法時帆祭酒詩翁所藏四庫副本旣命友人錄副復爲校勘所疑者仍以歸之庶子深甫依附韓平原宋史所載頗爲可觀然頗記周密齊東野語言趙師魯許及之諂媚侂冑之事

皆怨家誣之不足深信但侂冑盛時吾鄉諸正人如徐子式
陳止齋薛象先陳壽南輩皆遭貶斥而深父乃反擢官至知
樞密院則附託實所不免意文士急功近名如柳子厚之於
王叔文特宋史言之太甚耳予以其爲鄉先生書甚喜得之
而其詩用功之深尤有令予不能漠然者然則文字之託亦
惡可已哉同治七年八月二十四日臨清舟中書

跋劉練江先生會試硃卷後

此寶應劉先生永澄萬歷辛丑會試硃卷同治己巳予在金陵先生八世孫恭冕以見示卷式視今鄉會試謄錄卷無甚異而每紙二十八行無橫行卷前後印記所列同考考試謄錄對讀官諸銜名與今闈卷亦無甚異者明時鄉會試皆分經取士而會試如今順天鄉試分天下爲南北中卷應天蘇松諸府爲南卷今以校卷首印記皆合第一場四書義二易義五第二場論一擬表一判五第三場策五而明史選舉志言科場定式初場四書義三道經義四道第二場論一道判詔誥表内科一道與此不合豈定式有時不盡用耶士子試三場二十藝皆善然後得舉可謂難矣惟分經事若易然然

使學者得端治一經意最善蓋本朝乾隆間此制猶在也同
考官用藍筆考試官用墨筆亦與今制無異而卷首所列同
考至五人考試官乃止二人同考官五人贊善一人編修二
人檢討修撰各一人而考試官二人皆侍讀學士明正德以
後會試房考十七人用翰林十一人故翰林官獨多而易故
四房後以卷多增一房故五人也然明常以閣臣主會試以
翰林一人副之而此科主試二人皆讀學則故事亦不盡用
耶考試必用部院堂上官往往衰老而怠事明之制蓋不如
是也同考官五人贊善一人獨別列在前疑其爲本房而其
四人者修撰乃在末殆所得房考之次第房考之次第今常
以掣籤定之而不論官階豈明制已如是耶而餘四人者亦

與閱卷有評論語豈同經房考其職固爾耶今鄉會試以一人主一房而會試典試必四人明之制亦不如是也先生既第進士僅得爲順天教授遷國子學正以去崇正時起爲兵部主事亦未上與高忠憲顧端文文文肅劉忠端諸公友善相厲以風節事皆具明史而此卷之儀式有足以資考訂者予故備識之抑予讀先生與林廷機書以謂塞蹇諤之路務容容之福蓋深歎明之所以亂亡實在於是而自古亂亡之禍亦未有不由於惡直言者嗚呼危矣然先生所對策第一篇與終篇皆直攻神宗之失其言宦官之害與開採權稅之患語尤激切則明之言路未可謂盡廢也夫朝廷方惡直言而試士發策猶以時務爲問士之有志者猶敢直言得失則

明之制爲猶善矣己巳八月

跋丁中丞所藏劉給諫集抄本

此豐順中丞藏本予假得之以校所藏給諫集舊抄本中丞本蓋與予新抄本同出一家其訛脫及舛改處大略相似得不如舊本之善而亦有可互相補益者且閒有新舊本皆誤獨中丞本得之者以此知寫本書非多得數本無繇是正也予既取以校所藏兩本復爲中丞本校補一過大約以舊本爲主而文義可通者則兩存之庶使昔賢遺書多一善本予聞中丞藏書甚富宋元以來傳鈔祕本幾近二百餘種如能倣毛子晉鮑亦文故事合而刻之爲一巨叢書則豈徒藝林之幸將使前人文字在若存若沒閒者有以赫然著見於後卽中丞與之不朽矣同治庚午

跋陸存齋所藏抄本浣川集

此吾鄉戴文子集寫本吳興陸存齋觀察所藏存齋富於藏書予蒐訪鄉先生集往往求之存齋存齋所有者不予靳也存齋既以此本假予錄副而錢唐丁松生大令丙復以文淵閣殘本見寄蓋存齋抄本亦出閣本故閣本訛缺者存齋本亦然而閣本較善因并爲存齋校勘一過而還之惜閣本自卷四至卷八皆缺未能悉正訛誤其確知爲何字者以予意記之上方云某當作某而已存齋方銳於購書幸益求善本校之於此集乃爲無恨耳同治庚午五月二十八日記於金陵倉巷寓齋

跋抄本戴文子浣川集後

戴文子集人閒絕少傳本閣本從永樂大典採出次爲十卷
今年春吳興陸心源存齊以所藏寫本見寄旣倩友人爲副
墨而錢唐丁丙松生以文瀾閣殘本寄示因取以校寫本情
文瀾閣本缺第四卷至第八卷未能盡正訛誤閒有可以臆
決者則別記於上方曰某當作某而已文子從葉忠定爲文
詞之學故其詩特矯健文亦極似忠定然徒用力於字句瑣
瑣而理不足以植其根氣不足以爲之運故遂去忠定遠甚
予之所喜獨定海雲霄廟記王次點東巖記諸篇而已駢文
最爲用心而其病亦猶是也抑予思忠定嘗語蜀僧居簡云
林下名作將垂不朽不可使千載之後集中有上生日詩忠

定不苟爲文如此文子親受業其門而集中乃多貢諛權臣之作何其不用師法耶無異乎爲後世所詬病也然則吾輩欲以文章稍稍自見顧可以不愼也哉同治庚午六月二日大熱中書於金陵倉巷齋

跋固始周南屏鐵衣吟草

南屏周君以謫至瑞安館嶼頭林氏垂十年余戚林君若衣
每爲予言之同泊三年予備兵廬鳳若衣亦來爲蒙城令則
聞南屏化去已久而有子春暄方仕蒙亳開今年冬春暄自
皖來此夜訪予於倉巷寓齋出君所爲詩二卷見示則春暄
方攝令全椒以軍中功闕累遷其官且將爲太守矣君負才
能文稍稍不自拘檢至以場屋事獲咎遣戍而其獲咎之由
蓋有出於不得已者此天之所以猶庇其後也春暄兄弟皆
以壯年仕宦而春暄仕尤遂則所以顯親揚名以大慰君之
志亦豈獨特此詩之傳哉春暄其勉之矣君在瑞安久其後
遂歿於林氏故集中詩大半在瑞安所爲予方蒐輯永嘉集

蓋有取於君詩而他日爲郡邑志者言羈旅之賢其亦不可以遺君矣君詩嘗得其鄉人刊於蜀中已而板燬春暄旣至全椒謀重醵之而乞予爲之序故爲書數語於後時同治庚午治城山莊

霽山詩跋

霽山名某江甯駐防旗人其詩今體勝於古體五言又勝於
七言如晴日一簾人意嬾落花滿地燕泥香我來蒼靄外僧
揖翠微中僧歸黃葉逕樹襍夕陽山時有桃花落方知澗水
通有書關塞杳無地稻粱肥皆清警可誦予同年進士湘帆
太史壽昌亦江南駐防治經能文尤喜許氏之學著書數種
亂後略無存者而君子某獨能抱君遺詩以乞序於予於是
益爲湘帆歎矣同治庚午治城山庄

書孫歡伯大令母王宜人行述

歡伯仕浙蓋久予每從士友便坐閒見其書法甚善而未識其爲人前年在京師偶得杜清獻集抄本以畱黃巖王子莊使錄副攜歸台州謀刻之次年子莊書來云清獻集已刻畢工任其費者我黃巖令君則歡伯也予於是益知歡伯去歲十二月子莊將之京師先過予於江甯以歡伯所爲其母王太宜人殉難事略見示屬爲之題跋蓋太宜人當湖名家子幼通詞翰及嬪孫氏事祖姑能盡其孝相夫能致其誠夫卒又能教歡伯使有成立及杭州之再陷太宜人竟不得出以罵賊遇害此歡伯之所深悲也然予思是年八月吾甌奸民之亂吾家實先被禍先大夫與先太淑人倉皇避賊與太宜

人所遭蓋無甚異吾父母特幸而無恙耳此予之所不能無感也子莊又言歡伯宰黃巖首以計盡殲岐田賊連鋤去奸民之爲暴鄉里者黃巖之民始得息肩又改九峯寺爲書院購書數千卷藏其中俾好學者皆得借讀士或赴杭學歡伯必月致薪水費其應禮部試歡伯必厚資以行黃巖科舉久不振庚午鄉試榜出黃巖獲雋至九人歡伯閱報錄不知手之舞之足之蹈之也子莊爲予言歡伯事甚有味予謂歡伯視黃巖之事如其一身一家之事故休戚相關切如此吾甌庚申之亂首事者不過七八奸民耳使當時郡邑大夫有一人如歡伯何至糜爛其民延禍至於數月之久哉此尤予之所不能無感者矣昔孔子言卿大夫之孝而引詩所謂夙夜

匪懈又曰得人之歡心以事其親歡伯之治黃巖其勤如已
事如此其爲邑人士所喜如此可謂孝於其親矣然則太宜
人又何憾焉予故樂爲之書非徒以慰歡伯又將爲官於吾
鄉者勸勉之也時同治十年辛未正月書於金陵

跋懷仁聖教序

平生所見聖教集字雖形體具存而每恨其枯槁所謂刻殘字細者也此帖波磔精絕而姿韻流溢其爲數百年前舊拓無疑可寶哉昔王元美旣得定武蘭亭復得此帖深以自幸不知元美所見之本更何似也爲之神往予思唐時釋子多精八法高閑懷素幾於凌轢千古懷仁徒以集右軍遺蹟泯然伯仲其間然則成天下之善者亦何必皆自爲之也哉同治九年二月

跋曹文正公自書所作詩後二首

詩凡五十三紙歛曹文正公小楷自書以呈其座主覃溪學士其複重者則改定後復書以呈而學士又爲加墨也詩皆當時臺閣體不爲佳而書法特穩秀六十餘歲人猶能作此殊不易及覃溪在當時固爲老宿而文正已爲宰相猶勤勤以文字求正如鄉曲子弟覃溪亦抗顏爲之鈎抹塗改或直攻其疵類不少假借前輩爲學不自滿假而師弟子之間誠意相與如此殊非後人所及矣

予聞文正在政府時

宣宗眷注甚厚而文正謬謬務

持大體軍機考試僚屬例糊名而文正務取人望往往其人可用輒不爲上所錄必力爭用之又其將卒也先自定其時

刻遺疏千餘言手自繕稿附摺至十餘件皆當時切要事務
於戲承平時宰相識度過人如此然則此數紙又豈徒文字
之可玩也耶王申九月之望

元祐五年陸松書達磨論經卷跋

此卷舊藏揚州平山堂阮文達公家物也平山堂爲歐蘇二公遺蹟嘉慶丁卯六月二十一日歐公生日寺僧邀客爲壽文達因以此卷施之以謂爲其與蘇公同時楷法最精且屬寺僧歲歲爲二公舉此故事蓋文達自記如此亂後此卷爲李太守某所得今年太守至秣陵出以示予予謂陸松此書佳惡真偽皆非予所能知特以文達所藏又在歐蘇舊遊之地宜爲名人勝士流觀護惜卷中題識自嘉慶丁卯至今無慮三四十人前輩中予獨識前懷慶太守汪君孟慈最後黃雅州所記十人則大半爲予雅故而回首京洛亦復渺若天涯又何論文達何論歐蘇二公哉太守爲予言侯堂復時嘗

以此卷還之其意甚善今轉運使方定遠予友也好事而能文章其持此卷以謀之可乎同治庚午十二月十三日倉巷寓居

沈樞仙巖題名拓本跋

沈持要重修南塘事止齋先生爲之記在淳熙十四年三月
記云自冬十月至今三月而成蓋塘甫畢而此刻云丙午十
一月則始事之次月也記但云公與通判及兩邑大夫而已
得以考見名字賴有此刻陳永嘉令劉瑞安令與通判周价
皆見郡志職官而皆不著其字兩丞則并其名逸之矣偕行
八人皆郡邑士大夫或亦與築塘之役記所云卽里居謀殆
謂是耶張才卿爲忠簡公次子謝天錫謝雱沈季豐皆見郡
志而天錫季豐亦賴此以知其字高子莫林思純則郡志所
不載也甄良友亦無其人而選舉志有紹興甲戌進士甄龍
友今按其字則良友卽龍友也龍友之字亦獨見於此耳古

人於所游歷往往磨刻巖石書姓名豈無所爲而然也哉按
記所言塘蓋久壞屢議修而不果至沈公遂以半年之閒成
之可謂敏於事及觀此刻則知其所由速成而不費者亦躬
親其勞故也而又能與其僚屬及賢士大夫覽登山水託於
文字以垂後世則其志趣閒遠亦可想見風流太守非俗吏
所能爲也今沈公所修遺跡不可復見而自瑞安以達乎郡
民之出乎其途者猶若履康莊蓋公之澤遠矣兒子詒讓游
仙巖嘗爲拓一本予旣深慕太守之賢而又喜其字法勁整
有似顏清臣或止齋先生爲之書耶恨未得先生它書以證
之也同治庚午人日書於金陵冶城山麓

書王阮亭古詩選後

每讀古詩選卽疑漁洋論詩意主清遠而淵穎詩多平實以漁洋篤嗜如此王子秋再讀此選始知淵穎雖有平實之病而隸事極詳瞻音節極鏗鏘氣體極深穩與漁洋有相近者宜其好之深也益知古人文章流傳至今必有不可磨滅之故而古人有所論述以示後世亦必非專信已見而無當於人心之同然也未可以輕心掉之九月二日記

予此語未免稍阿漁洋究之覃溪以爲可刪者是也丁巳五月十九日又記

詩至道園渾化極矣立夫乃以全篇排偶行之句句劈實殆欲變而自爲一體然恨未甚熟若真到成熟時似亦可衍韓

蘇未竟之緒漁洋取之或欲示人以變亦未可知丁巳五月
二十三日鐙下又記

書海峯姬傳所閱古詩選後

此本從林頴叔樞部借閱頴叔又假之他人者其卷後有陳
爾祥跋云從管異之得姬傳先生評本以紅筆錄入又有名
溥者記其後則云梅葛君謂圈點多濫是劉海峯筆余既逐
錄三五卷按其所取多不中理非徒濫而已不但非姬傳筆
恐海峯亦不至是殆淺人所僞託而其評語及間有箋記則
皆精確有據決爲真姬傳筆無疑也不欲中止故遂錄之終
卷陳氏間亦自加圈點其失亦不免濫而其評語亦時有當
者又其書爲翁氏覃溪刻本翁氏之論則精矣故并錄之以
資參攷但恨不得真姬傳評本一校正之丁巳五月十九日
記

書姬傳先生今體詩鈔序口後

予謂五言當止於貞元七言唐當止於玉溪生宋當但取黃放翁而以金之遺山附之乃能成一家之風旨示後世以涂轍阮亭能棄杜韓五言而惜翁不能芟去雜家故阮亭真漢廷老吏也乙丑十一月三日富陽舟中記

阮亭五言不鈔王孟非無見也不鈔老杜則將置大小雅於何地耶又記

阮亭七言之取吳立夫亦非予所解又記

題祝京兆草書卷

香光居士謂京兆書如綿裹鐵如印印泥此作殆不盡然
顧華玉文徵仲皆謂其晚年狂放似徐武功此殆其晚境耶
宜謹堂甚寶貴之卷後有翁文勤詩在壽春園城中作題額
則馮代州筆也兩公皆舊時文字交爲之憮然同治甲戌

書張敬堂所藏漢唐帖後

同治甲戌夏間謹堂觀察持示漢碑篆隸各一同州本聖教序二漢之奇古唐之精嚴皆臨池家不可不歷之境竊歎壯年不學今忽忽遂六十矣腕力益退無能爲役獨於人事叢雜時輒一緝閱猶覺意愜關飛動也

跋曾文正公書勤謙敬恕四大字後

文正公書未嘗有法而嚴正秀偉如王商坐漢殿廷文忠烈見北使令人望而起敬中國鉅人固當如是世間文士但知弄翰墨爲姿媚不復讀書養氣真無足觀此四字爲其宗人介侯廣文書尤宜爲我輩銘座右因屬廣文鉤勒上石嵌置安慶文正祠堂俾詒同好甲戌長至

跋文正公書杜詩後

文正曾公書山谷詩此書杜老五言一章亦爲价侯作而其筆法仍近山谷亦平生剛毅正直之氣發於胸襟者自相似耳五百年後當與杜詩黃筆並貴天壤甲戌長至

跋畫梅花

放翁梅花詩淺鬢常鄙桃李學獨立不容鴛鴦覬山礬水仙
晚角出大是春秋吳楚僭餘花豈無好顏色病在一俗無由
砭朱欄玉砌渠有命斷橋流水君何欠放翁奇氣兀傲如此
宜其常欲攬印橫戈爲宋家雪百年仇耻侯求陳太守畫
梅求予題詩畫之美好予未能知而每讀放翁詩意輒爲之
感奮因爲書之他日此畫以予書重以放翁詩重則予亦不
能知也甲戌長至

書姚慕庭詩後

予與慕庭相識垂二十年去歲忽自江西來問所以則已掛冠矣予方謂慕庭年甚盛仕方遂乃能輕棄富貴心甚敬之既詒詩二章尤清麗拔俗予初不知慕庭能詩不謂其工遂至於此數月後又以詩一卷見示予雖愛慕庭詩以官事冗襍竟未及開視既得交代清坐頗閒試取讀之愈讀而愈不能已乃竭半日力讀之終卷並爲點定慕庭詩於鮑謝子美退之義山山谷蓋無所不學而其沈思邃慮獨異於人人則似有得於君子之道宜其未五十而棄官如敝屣也予今年六十一方將入見天子出事大官所愧於慕庭豈獨文字間哉乾嘉以來詩人清麗深厚無以過於君家惜抱而君詩

之沈鍊峭拔則又出奇於惜抱之外非家學所能囿也惟近
作數首乃似過趣刻削如江通湖水白樹補遠山青語豈不
工然如此摹畫恐爲晚宋江湖一派矣試看杜子美蘇子瞻
摹寫景物輒有天地開闢萬物發生氣象慕庭年壯氣雄宜
其不屑屑於此也

兩烈婦碑跋

光緒元年秋予治六安州民王道隆妻胡氏獄旣直其冤已
復得州吏榮瑞妻程氏事蓋皆危爲州官堙鬱之多鳴呼赴
兩弱女子耳徒以惡爲不潔矢死無悔而士大夫乃有回惑
卻顧苟其生於富貴者可恥也哉新湖北布政使孫衣言書
刻石

題馬生其昶文卷

姚慕庭壻桐城馬生其昶以文來見喜其簡古有體繼復論
予書一篇則陳義尤高也生年甫二十而已有意介甫它日
豈可量哉雖然文章固有本焉讀書必多蓄理必博涵之爲
千仞之淵而崇之爲萬仞之嶽則介甫不足爲也抑又聞之
少年爲文字須有春夏氣而生之文秋氣爲多將有鬱而不
舒之患則收斂之過也宜稍縱弛之於生之年爲宜并以質
之慕庭光緒乙亥冬日

書程琢堂詩後

琢堂官皖中蓋久予初守安慶在定遠琢堂亦在淮北而未
嘗相見後從曾文正再來此則琢堂已歸人頗言琢堂能吏
然恨未見也今年春琢堂子某以其所爲詩三冊見示乞爲
一言予不足以知琢堂顧其詩頗言淮南北寇亂事所與酌
和諸士友往往有予相識者不能無慨於心爲書數語還之
光緒元年十二月

書郭慕徐芹曝錄

慕徐承其家學恂恂循理而留意世務如此殊不可及然天下事亦未易言固有及之而後知者考古讀書深藏若虛願爲賢者進之乙亥十二月

書王秀峰時文

秀峯令潛山時時爲予言天堂林壑之勝勸予往游又時時以詩寄予殆有異於俗吏之爲乎今讀其時文所謂一得齋稿者驚寶雄厚閒出奇變無詭於義理而移合於先正之法亦非俗工所能爲也二十年前喜論時文亦喜爲時文通籍後此事不復講矣今讀此集猶如馮婦復見搏虎乙亥十二月二十七日

維舟酬唱集跋

蓬海太守接伴安南三行人既自長沙旋鄂哀其在塗酬唱詩數十首曰維舟集以見示太守詩才俊逸三行人清辭麗句亦皆異曲同工於此可見聖世同文之盛而絕域萬里之外所以能慎守封土繇厯數百年雍容和樂無兵爭攘奪之患亦其被服聖人之教者深也丁丑仲春遜學老人孫衣言記

書玉山草堂集後

玉山草堂雅集十三卷溫明叔前輩所藏卷首金粟道人小像則翁侍郎叔平移摹梧門祭酒詩龕本也光緒戊寅夏初偶於金陵胡君所見之假歸置案頭幾兩月以官事冗雜未能盡讀頗以爲恨四庫目錄言是書世罕傳本王士正居易錄記朱彝尊於吳門陸醫士家偶一見之此本卷數人數及所列諸家小傳詳略與目錄所言適合雖不必卽陸氏本要之舊抄全書也玉山遺書四庫箸錄有玉山璞藁二十卷玉山紀游一卷玉山名勝集八卷外集一卷予所藏僅有璞藁及名勝兩集而草堂雅集僅得殘本三卷爲陳旅柯九思李孝光張雨丁復五家之作今以此書校之丁復張雨詩具在

獨無陳柯李三家又予書陳旅卷首題曰玉山雅集卷后之一柯九思張雨卷首則題曰草堂雅集無卷數蓋亦非一手所抄也眾仲丹邱五峯在玉山交游中最負盛名不知何以不在此七十人之列而伯雨仲容二人又何以複出疑當時所輯不止此十三卷惜予書不全無從攷其異同所繇來矣

按楊維禎爲玉山傳云刻交游諸公詩自楊維禎而下四十餘家曰草堂雅集則鐵匡亦在集中可見當時裒輯非止一本

本玉山風流文采照映千古與此七十人者身當亂世而能以詩歌文譙自得於園林泉石之間可謂不幸之幸此書自竹垞翁時已爲僅見予乃獲見之又於卷中得張天英楠渠鄭東季明高明則誠陳秀民庶子四家之作皆吾溫鄉先生也尤以爲幸胡君謀重鐫諸板俾後世得以共見此書其意

甚善予謂眾仲丹邱五峯三家詩宜依其舊題附之卷後名勝集名勝外集亦宜併刻以傳庶幾一時游從之盛可以具見自昔勝流莊士文字之傳常有鬼神爲之呵護卷後一集尙在人間予猶當獲見之也六月十一日雨中瑞安孫衣言書於瞻園

書周忠毅公墨迹遺卷後

吳江周忠毅公宗建疏藁五篇禠文十三篇江寧趙教授彥脩得之忠毅後人裝爲二卷將送之焦山與楊忠愍公諫草同藏以垂後世而先以示予忠毅遺集予未獲見僅於近人潘氏所刻乾坤正氣集中得其奏議四卷今取以校諸疏在集中者三篇一申救三御史一請斥逆璫魏進忠并郭鞏交通設陷一按楚陞辭明用人以佐銓政大抵集中所載字句多同稿本而亦間有增損詳略之異蓋上奏時再三點易此特其初稿也陞辭疏自用人之權宜尊以下尙有七百餘字稿皆無之其劾郭鞏攻訐劉一燝熊德陽及妄論計典一疏後亦未全則以別紙佚去矣忠毅與黃忠端尊素李忠毅應

昇萬忠貞燬皆爲魏璫巧法所中死於天啟六年閏六月此
三疏一爲天啟元年閏二月十二日上一爲二年四月二十
九日上一爲三年十月二十八日上陞辭稿最在後而卷中
列之第三裝次時偶未及攷餘二疏及禠文十三篇播刻所
未收更無從攷其詳矣明季逆璫之熾爲漢唐末造所無士
大夫受禍之慘尤千古所無也忠毅與同時諸公明知忠賢
凶醜之不可犯而激於義憤不顧身命力與之爭一時氣節
之盛可以感動百世教授又記忠毅幼時輒知慕楊忠愍爲
人嘗曰楊公不死彼嵩鸞者今安在哉蓋其剛大之氣得於
天者固然宜其文字流傳非兵火所能滅也今此卷以爲教
授所得遂與忠愍疏草同藏名山教授可謂有心抑豈非忠

毅之精神志氣有以自永也哉循誦再三爲之歎息光緒四
年六月十九日瑞安孫衣言謹記

跋抄本吳彥匡花史後

舊抄本花史十卷凡八冊今年夏得之金陵卷首自序第一
葉有翰林院印纂脩四庫書時經進本也書爲永嘉吳彥匡
葵衷所著蓋全芳備祖羣芳譜之類無甚關係以鄉前輩遺
書見之甚喜因以重賈取之前數年偶讀溧水邢昉孟貞石
曰集見有贈永嘉吳葵衷明府詩云年近八旬眉覆面一生
讀書逾萬卷二十年前綰一綬驂駢蹠躑龍南縣攷之郡志
選舉有萬厯辛卯舉人吳彥匡龍南令始知葵衷卽彥匡以
績學享大年而官終縣令又云著書愛纂神農經不學雕蟲
注爾雅疑其又精於醫今觀此書詳及花之入藥則所謂神
農經蓋卽指此葵衷此書郡邑志旣不著錄其姓名僅見選

舉題名今觀其自序則少年領鄉薦久困公車晚乃沾一命復以骭髀罷斥垂橐而歸其出處略可攷見而氣節亦有過人者孟貞所云彭澤罷官歲歲貧非諛語也此書四庫存目以爲內府本似當時已入中祕而竟不得列於冊府不知何故又其序例自言勉就一命又言甌土宜樹植又言甌中去武林不遠則其爲溫人而官縣令灼然無疑至所謂權輿於蔣養庵之花編曹介人之花品者序例亦具載之提要掠爲己出遂沒其原文而於爵里之確有可據者更不復詳當時纂脩諸臣疎易立言往往如此郡邑志之疎漏不攷又何足深尤哉光緒戊寅十二月遜學叟書於瞻園

又按康熙漳州府志八秩官題名有詔安教諭吳彥匡然

則葵衷盡由教職擢宰龍南同治福建通志誤匡爲臣吾
溫郡邑志則不復知其嘗爲教諭矣己卯三月又記

書劉炯甫詩後

予與炯甫別逾二十年今春炯甫遣其從子伯瑜就予金陵
並以所著岷雲樓集見示屬爲之序伯瑜之來蓋謀爲游客
以自活予旣無以處之因速其歸瀕行復出此卷眎予則炯
甫官蘭州時所作詩以寄其弟姪者予與炯甫穎叔稱詩都
下在咸豐四五年間自今思之殆如隔世予日衰惰廢學而
炯甫猶矻矻文字如此良可慕歎序旣不能卽就姑書此卷
以還伯瑜炯甫試取視之昔人所謂年雖衰而意氣尚存者
予之有媿炯甫多矣光緒五年二月瞻園

遜學齋文鈔卷十一

題跋

瑞安孫衣言劭聞

廬江黃徵君以王良常書謙齋二字索題

書貴瘦硬方通神陽冰篆法也良常謙齋二字與其楷書正是一家筆墨鹿原林佶蓋卽書漁洋詩午亭文者三山人士蘊藉如此亦復可愛己卯九月瞻園

書汪叔明詩卷後

叔明於予爲鄉試同年而未嘗相見在京師時識其兄陳仲穆恂恂篤謹喜佛書尤工爲詩然屢言叔明工畫善詩詩殆出已上予甚思叔明恨不得一見仲穆旣老不第進士卒予旋出官於外及來皖楚叔明時以書來論且屢致山水畫幅箋面予雖不知畫獨謂叔明山水秀偉可喜如仲穆言益思見其詩不可得今年秋仲穆之孫孝寬來試金陵叔明子彥份埶書以來並以叔明所爲夢衲菴詩見示屬爲之序益歎仲穆言不謬予久病甫起不能用心爲文字又適有還朝之命旦夕治行因思在京師與仲穆游尙如昨日忽忽已三十年而叔明遂不得一見今幸得見其詩又以人事冗雜不

能爲之一言甚矣文字之交友朋游從之樂其可以爲易得而忽之歟爲書數語還之叔明詩雖不多然皆溫雅如中唐人他日與仲穆集並刻示世是則彥份等事也光緒己卯八月遜學叟孫衣言書於金陵瞻園

劉文清公手書杜詩冊題後二首

諸城書勁秀峻潔自晉魏初唐諸公無不學焉而得其意而用力尤在魯公故無一纖佻之筆嘉道以來士大夫好爲姿媚今乃一變而爲險怪殆有如歐公所謂以直爲橫以方爲圓者編仄峭薄之習生於其心害於其政豈細故也今觀此冊猶想見雍乾盛時大臣閎篤氣象

肅代中興而禦將之權替高孝中興而養兵之患成自古削平禍亂之際勢所偏重常足以兆異時之禍亂深識之士知其勢所必至而預爲之慮則偏重者可漸平也庸人不學鼓其浮淺與勢俱趨而天下事不可問矣杜公秋愁十二詩自我虜何曾盛以下數章乃似爲今日言者花門小箭數語尤

遜學齋文鈔卷十一

三

可歎息古今成敗之局如出一轍固如是耶文清當
純皇時武功極盛正所謂崑崙月窟東嶠巖者而書此數詩
亦豈無意

尊卑一制司馬司馬司馬
重負一制司馬司馬司馬

三月初間予病甚不能親案牘者幾五旬六月稍間忽江甯
石君以書來詢曰邑人士請以閩二林公配食一拂先生度
已得請予甚駭之卽令吏檢舊牘則邑人適以予病時投狀
督府督府檄藩司議覆吏以爲必督府指也卽就元狀稍加
點竄上詳已報可矣予亟以實陳之督府曰實因病昏未及
親閱此稿此非二林公所樂也君子愛人以德當由督府追
駁寢前議督府沈公不之答復詢之守令則董斯役者已節
主送入祠矣予悔恨無及竊謂林文忠江南名宦固無事此
祠學使林公果有造於庠校亦當別爲之祠若與鄭監門同
坐而食雖清苦如海忠介猶未免有慚色蓋忠介猶近名故

也人情好諛固不足怪而以病有此誤謬亦當官之大戒也
聊記其後異日爲江甯志者無謂此舉由予成之也已卯七
月瞻園書

跋宋徽宗草蟲畫卷

此畫偶爾涉筆而淒涼荒率之趣恍如遇之秋林曠壑中非
贗作也古之帝王如漢章帝唐太宗皆喜書帖風流文采照
映千古古人君幸當太平無事萬幾之餘游心藝事視求神仙
恣游幸者志趣固不侔矣文人墨士每見李後主宋徽宗遺
蹟搖筆醜詆使其出於英君哲辟則必以爲天縱多能矣然
則徽宗所不足者獨在爲君耳畫焉足以爲累哉士兄弟其
善藏之遜學叟

跋章恭毅自書五言詩小幅

甌東參政嘗言某秀才讀書蕭寺時見恭毅章公曳杖而
蓋忠臣義士其貞魂毅魄久而不滅也今觀此紙與親見恭
毅何異後世小人善爲書者如蔡元長許深甫之徒雄壯偉
麗未必不過於此然自君子視之殆如糞土嗚呼人亦安可
不自立哉光緒庚辰

跋黃文簡公歸永嘉送行詩文長幅

宣德二年永嘉黃文簡公乞養歸里時公年踰六十太翁年八十九矣宣宗自製詩以寵其行一時同脩實錄諸公李文毅公時勉等又各爲詩而楊文敏公榮序之也老疾引退人臣常事而君臣父子之間遭際之盛如文簡者蓋古人亦不多見其後優游林下垂三十年復兩召赴闕而歸三朝恩遇始終如一此尤予之所慕也史稱文簡爭阿魯台事上顧謂羣臣曰黃淮如立高岡無遠不見它人但見目前耳嗚呼爲大臣如文簡者予誠敬之爲詩文者十人楊榮余學夔李時勉蔣驥蘭從善周孟簡陳循錢習禮周敘曾鶴齡惟學夔從善鶴齡明史無傳而其文章行治往往爲世稱述蓋文簡同

遜學齋文鈔卷十一

七

志之士非徒史院寮案而已光緒庚辰中秋

跋何无咎書譜臨本長卷

道光丙午予在樂清大荆孟氏見丹邱手書募脩雁山淨名寺疏橫恣特甚想見其兀傲軍幕酒後叱咤之概今此卷乃獨收斂開雅一如過庭尺度蓋尤矜意爲之然以予視之獨愛其橫恣爲山人本色天下事有所依傍則浩然之氣必爲少損亦不獨字畫爲然也光緒庚辰孟秋邵與書

曹堡孫氏族譜跋

曹堡在平陽十八都道光丙午予以詢訪宗親一至其地問其長老自云明崇正時有諱君明者自樂清孫家洋徙瑞安孔家嶺又自孔家嶺徙此而望出樂安與予潘埭孫氏蓋異族云索其譜牒則云亡佚久矣今年八月族人某以所輯新譜成來求爲序蓋以同姓之故欲得一言以爲譜重予念曹堡孫氏落落數十家而能不忘其祖網羅散失以成此譜可以承先可以示後其意殊足尙也爲書數語還之南方孫氏自吳大帝後始以富春爲望其實皆出樂安所謂望者以顯人所居一族所仰望耳而流俗輒云出某郡者謬也因附著之光緒庚辰八月邵興寓廬書

跋陳邦彥手書天馬賦冊

世言匏廬書似董文敏而此冊自謂效誠懸筆法然其氣韻清拔乃多出於醴泉銘書雖一藝非博覽諸家固不能自成一家也匏廬爲編脩時嘗入直書房仁廟御製文字繕寫多出其手觀此冊題款蓋亦南齋進奉所作不知何以流落人間也光緒庚辰八月遜學老人書於城北邵興寓廬

書重宴鹿鳴位次圖後

光緒己卯江南鄉試時予尙在藩司任爲外提調是科重與鹿鳴宴者六人上元溫明叔前輩以戶部侍郎在籍官最大次則貴筑周子瑜觀察方主講淮揚間請就近與江闈宴周嘗得三品銜居溫之次其餘曾任道府州縣者四人先時有司議重宴諸公位次欲席溫周二公於考官之次而餘人位新科舉人之上來質於余且言本朝會典鹿鳴筵宴圖但有新科舉人位次無重宴舉人位次予語之曰重宴之榮非榮其與考官宴榮其以六十年前之舉人與六十年後之舉人得爲周甲同年而與此宴也位宜與新舉人爲次而皆別設席會典無圖者以爲無待於圖也而當事者終以爵位旣高

不宜下儕舉子仍用元議繪圖來上予批其牘背曰獨居高
坐既無賓主之分還顧同年頓有雲泥之隔是徒崇夫勢利
豈可著之典章圖當改議已而奉命內召置不復問有司遂
以元圖從事矣幸而溫侍郎方在安定書院畏江濤之險不
果來周及餘人皆不至供給官但循例致送扁緞而已使重
宴者有一二人到則非禮之禮必爲笑於大雅矣

陳菊潭時文跋

陳君菊潭與予先後爲學官弟子而未嘗相識居京師時每聞凡山舅氏言菊潭靜篤悅學通天官厯算家言心甚慕之徒以仕宦奔走不得一見去歲冬自金陵內召乞假歸里菊潭始來視予則相對皤然皆六七十翁矣問以所著書未肯輒爲予出往還旣久始以時文三五十篇相眎受而讀之皆根柢義法涵潤經史與近時浮華之士絕異然菊潭在校序逾三十年竟不得一食廩食豈命固有限之歟漢魏以降推舉之法不行於州里士不繇科第則無以致其身不幸迫於饑寒有叛棄所學苟焉以營其生者菊潭老且貧猶以時文講授鄉里枯槁憔悴無改其樂其趨尙殆非流俗人所知

然則此三五十篇者又烏足以盡菊潭哉光緒庚辰十二月
望前一日

書鄭龍圖母陳太恭人墓誌銘後

右直龍圖閣鄭公伯熊母太恭人陳氏墓誌銘去年秋鶴陽謝君恩澤錄以見示且謂予曰鄭氏墓在永嘉四十一都東村證覺院後左側山麓鄭氏家譜謂卽龍圖墓以碑碣不存爲近地農民私墾爲田道光末年鄭氏脩墓猶未能實知所在及掘地得此乃知爲鄭氏數世墓域非獨龍圖兄弟兩墳也又云碑言二子第進士鄭氏譜言熙績四子長伯熊次伯英次伯海次伯麟與誌不合未知孰是予按龍圖爲吾鄉大儒薛文憲陳文節皆其弟子實爲永嘉學問所自出與弟伯英伯海並見郡邑志儒林義行列傳其宦蹟初由進士尉黃巖而終於宗正少卿直龍圖閣知建寧府碑爲其母夫人作

故但以在朝在外隱括言之而其後先次第實與陳振孫書錄解題合可訂郡邑志之舛漏又郡邑志不詳龍圖父母得此可以補所未備且知龍圖爲陳公一鶚之甥一鶚字開祖亦吾鄉儒宗也碑中所言陳氏家世與張橫浦集陳氏考妣墓銘合言乾道丁亥郊恩淳熙癸未慶典與宋史合又按水心祭龍圖文曰衰親八十止齋祭龍圖母文曰孫曾百指今攷碑言太恭人八十有七當乙巳二月庚辰卒則龍圖卒於淳熙八年辛丑太恭人已八十三而孫與曾孫凡十人適合百指之數獨龍圖由守甯國秩滿復知建甯乃卒而誌言守甯國府卒或錄本偶脫二字其餘亦尙有數字訛誤惜原石已納壙中無可覆驗矣誌文簡古有法當卽文節陳公所爲

而後歟云宣教郎新發遣桂陽軍事陳某書古碑體例
著撰人姓名者殆亦錄本脫之耳

又鄭氏譜言熙績四子與碑不合者碑但舉中第二子亦
如言陳氏家世但舉一鶚亨朝而不及三子一夔非譜誤
也又碑言孫男耆仁志仁由仁處仁爲仁求仁好仁按止
齋集承事郎潘公墓誌云二女孫長適直龍圖閣故宗正
少卿鄭伯熊四子處仁又分韻送王德脩詩序云鄭志仁
字能之能之與叔父伯英字去華則以故龍圖先生嘗客
德脩於宣城志仁蓋亦景望子而伯英二子爲仁求仁見
於水心所作景元墓誌惟好仁不知誰出又碑言女適周
諤女孫適諤子宏中郡邑志皆無攷亦當爲溫人也郡邑

志人物一門疏舛尤甚不由科第者雖達官如侯臨林介
皆佚其姓名猶恃故家大族譜牒尙存可以蒐補前數歲
永嘉修志嘗詒書當道多取民間私譜視其官名制度與
史合者補入志中別立仕籍一門凡不由科甲而得官者
俾得賅載乃爲詳核然不能行也辛巳二月邵與書

書泉州志裴震忠傳後

海上事起議者爭言船礮之利予獨謂非短兵步卒不足以制敵且短兵之利尤恃刀盾然苦無左証及讀魏默生所著聖武記言康熙間羅刹軼邊朝廷卽遣兵驅出之敵獨畏中國藤牌謂之大帽子兵則知國初時制馭西戎固不恃船礮也而詢諸北方人無言藤牌者不知當時所用何處兵也去歲偶得泉州志讀之至裴震忠傳言康熙二十五年羅刹犯境震忠以所部福建藤牌兵從大將出征五次奮勇爭先俘馘無數乃知當時所用閩兵也羅刹火器之精自明已然回礮紅夷礮則自元時已入中國稱利器而國初用兵西方獨以藤牌取勝然則西人火器之利所以著於中國以中國

所無西夷之所以畏我藤牌又以彼之所無故也利鈍之間
在一轉移而今之言船礮者乃欲用我之短攻人之長豈不
愚哉閩浙諸營鄉皆精藤牌技予嘗詢之老於行陣者云廣
州藤牌其製尤鉅而輕礮火所不能入近來洋槍洋礮之說
興蓋漸廢不講矣噫非讀泉州志惡知我之自有利器也言
兵者亦安可不多讀書哉庚辰九月滬上舟中

書葉文定公薛德老墓銘後

水心先生爲永嘉薛德老墓誌言楊么據洞庭陸耕水戰船十餘丈官軍徒仰視不得近岳侯謀益造大舟公曰若是則未可以歲月勝矣且彼之所長可避而不可鬪也今大旱湖水落洪若多購舟首勿與戰逐筏斷江路蘗其上流使彼之長坐廢而以精騎直擣其壘則破壞在目前矣岳曰善兼旬諸寇悉平宋史彌傳亦載其事旨哉德老可與言兵矣夫楊么所恃洞庭數百里之湖耳非有重洋絕島風濤不測之險也其樓船十餘丈亦非如今日西人機船之堅利也岳侯當高宗中興之初財力富贍益造大船未必不足以敵么而德老之言如此且德老之意以爲彼之所利既在樓船我雖

益造大舟以與之角而彼猶得用其所長則勝負之機未可立決必別求所以奪其長使彼之船坐廢而無用而勝算乃全在我矣抑船固未可以速成儻歲月之間或有他變則不能并力以圖么此其所以料敵而決策也智勇如岳侯不敢自是決然從之而兼旬之間諸寇悉平則不獨制一楊么而已也賈生謂武帝曰漢之長技五匈奴之長技三用兵之世蓋無不有所挾以爲制人之具而惟善制人者必使敵常見其短而我常用其長此所以百戰而百勝也觀於德老之言益信然則今之言海上事者徒鯁鯁於敵之船堅礮利而以爲弗可與敵抑亦不學之過也已

遜學齋文鈔卷十二

雜著

瑞安孫衣言劄聞

大鄭公行年小紀

鄭文肅公在宋南渡時爲吾鄉大儒薛文憲陳文節蔡文懿諸公皆其弟子實爲永嘉學問所自出以不爲苟合官止九卿宋史不爲立傳郡邑志列之儒林傳敘次尤多舛漏偶於讀書之暇畧爲考訂爲行年小譜一卷庶後之人有以考焉

公諱伯熊字景望永嘉人父熙績母陳氏以宋高宗建炎初生公

按郡邑志二鄭公傳不詳家世水心爲景元墓誌亦不

書其父母去秋得公母陳太恭人墓誌言太恭人陳贈
朝請郎鄭熙績之妻贈奉直大夫豫之女朝請之先三
衢石室人周廣順中六世祖官樂清其子延祚遂居永
嘉又考張九成橫浦集陳氏考妣墓銘言豫字謙仲封
右承議郎四女次適進士鄭熙績熙績邑志進士題名無
或舉而未中第
墓銘爲陳一鶚開祖父母作則公乃開祖甥也陳太
恭人墓誌言恭人以淳熙乙巳卒年八十七而景元墓
誌言景元卒於紹熙三年年六十三景元之生當建炎
四年戊申則公之生當在建炎元二年間

伯興十五年中進士第

陳騏中興館閣錄七鄭伯熊劉章榜進士出身治詩兼

經義萬厯温州志選舉紹興乙丑劉章榜鄭伯熊平嘉
人按乙丑爲紹興十五年公登第時年蓋有十六七

授台州黃巖尉紹興二十年至黃巖從高士徐先生庭

陳耆卿赤城志十二黃巖尉鄭伯熊永嘉人文行爲學

者師紹興

元誤作建炎

二十年至人呼爲石蓮縣尉以其年

尙少而堅不可磷也

按是時公年甫二十二

宋史隱逸徐庭筠傳

附父中行傳後

曰黃巖尉鄭伯熊代去請益庭筠曰富貴易得

名節難守願安時處順主張世道伯熊受其言訖爲名

臣又林表民赤城集石磐徐季節墓誌云尉今龍圖鄭

公伯熊生日有獻歌詩者先生作上壽論貽之公得論

喜盡卻賀者其罷也求言於先生先生曰富貴易得名

節難保公謹受焉蓋公少年時志趣已如此

再調婺州司戶參軍

凌迪知萬姓統譜黃宗羲宋元學案皆言公登第後歷

黃巖尉婺州司戶

萬厯溫州志乾隆永嘉志皆失書黃巖婺州二節湯成烈永嘉志稿失書

一節而不詳其歲月橫浦集陳氏考妣墓銘云孫女八

人次適左迪功郎婺州司戶參軍鄭伯熊

於太恭人爲姑姪惟開祖

兄弟三人不知公所娶誰女

按開祖母潘安人以紹興二十五年乙

亥卒銘卽作於是年時公適官司戶惟不知黃巖以何

時滿替婺州以何時到官耳今金華志職官則并其姓

名佚之矣

孝宗隆興元年除秘書省正字尋以奉祠去

中興館閣錄八正字隆興以後鄭伯熊元年三月除八月監南嶽廟按宋制凡合錄簿尉有薦才任館閣者召試而後除公蓋在黃巖時以薦被召而不知薦者何人爲正字甫五月卽監嶽廟蓋以不合求去而得祠祿也姓譜萬厯志學案皆云召試正字除太常博士而不知其以奉祠去又所謂遷太常博士者於它書亦無可攷姓譜學案於常博後卽繼以出爲福建提舉萬厯志於常博後卽繼以遷吏部侍郎不知其爲提舉由吏部出吏部則由佐著作遷且公在吏部爲員外郎非侍郎也

宋制尙書六曹吏部最峻敘遷之法必由刑戶侍郎乃轉吏侍常博轉前行郎中特旨乃得左右司諫殿中侍御史耳萬厯志蓋不攷之甚

乾道二年冬召爲國子丞

諸書皆不言公嘗丞太學薛季宣浪語集五有送鄭景望赴國子丞詩二章又集六送景元赴秀州判官詩序云走歸自武昌始獲交於景望景元又云居數年景望召爲國子丞又兩踰時景元赴由拳從事其序末曰乾道三年四月二十七日則景元之赴秀州卽在是年攷浪語集附錄鄭伯英祭常州先生文云歲在甲申公歸里居甲申爲孝宗隆興二年公之被召當在乾道二年其送詩有句云好溪寒已半京洛暖應回好溪卽今處州溪通甌江者是二年之仲冬也景元以次年夏赴官自春而夏可云兩踰時矣又送公詩序言及冰與又有

鄉人儀之之語蓋海溢之後有人薦之而家居被命則
爲乾道二年丙戌之冬無疑又送公詩次章有云百惱
愁成斛羣疑鬼載車而序亦多戒辭蓋公久食祠祿至
此始有召命故勸其避疑忌以俟大用耳

乾道三年六月除著作佐郎尋兼太子侍讀

中興館開錄七著作佐郎乾道以後鄭伯熊三年六月
除四年六月爲吏部員外郎又錄四脩日厯式注云舊
式少監程俱定紹興三十一年四月少監陳之淵著作
佐郎張震復上建炎以來日厯格至乾道間著作佐郎
鄭伯熊以新舊格參立按是年冬金使賀會慶節上壽
在親郊散齋期內公在館職移書政府爭爲北使用樂

見李心傳朝野雜記乙集四

乾道四年六月爲吏部員外郎

浪語集二十四與鄭景望書自聞拜佐著作之命嘗一
領教畢又云又拜手札感尉良甚啟沃微意畧蒙見教
思之誠切時病十寒一暴何以哉願勿以未聽而情我
告導之心成所謂遠者大者必不可進乃鴻鵠舉耳按
陳振孫書錄解題十八言公爲館職王府東宮官姓譜
學案志稿皆於吏部郎後繼書太子侍讀萬厯府志失
此言拜佐著作復言啟沃微意是爲著作時卽兼太子
侍讀館閣錄偶未及載而諸書皆不知其由小著遷郎
官又姓譜繫此於監國司馬後學案繫此於知婺州後

志稿則於黃巖代去後卽云入爲吏部員外郎皆爲光
敏又按與書前言勿以未聽而惰我告導之情又
不可進乃鴻鵠舉則公爲侍讀時已有不合而去
攷浪語集十三劉復之哀詞云歲大災饑癘比
請粟於郡身挾醫撫鄉士大夫家戶到又云走乃大服
介鄉先生鄭景望吏部一見復之爲郡司戶在乾道初
年其亡在乾道六年四月而哀詞猶稱吏部則公爲郎
官歲月稍久未幾遂以提舉常平出矣

出爲福建路提舉常平茶鹽公事

同治福建通志九十宋職官提舉常平茶鹽公事鄭伯
熊乾道間任

朱子集八十五何叔京鎬墓碣再調汀州上杭丞數行
縣事專用寬簡爲治罷稅外無名之賦人便安之部使
者鄭君伯熊名好士行部得君甚喜顧郡事爲不理囚
禁或累數月不得釋檄君佐其守又三十六答何叔京
書來使云願招歸流亡復業及募得新民願受一廛者
此最厚下固本之良策然更有方便與寬得一兩項泛
科亦久遠之利來者必益衆矣如何聞新倉使鄭景望
甚賢或可告語耳按叔京墓碣不言調上杭年月而福
建志職官上杭丞何鎬注亦但云乾道間任薛士龍復
之哀詞作於乾道六年六月後尙稱景望爲吏部則其
出爲監司當在六年秋冬間

姓譜學案皆誤繫正字常
博後萬厯府志永嘉志湯

成烈永嘉志
稿皆失書

越一年遂有寧國司馬之命蓋其在

月甚淺政績可見者獨賴有朱子一碣一書耳

魏王愷判寧國府召爲王府司馬

浪語集二十四與景望第二書茲承寵膺綸命綱紀王
府佐宋太伯蓋極一時之選可謂儒者之榮敢以爲賀
然聞以國遜易處閑靜難非漸漬以仁義之指歸俾知
所自以優於天下之樂無以見輔導之德以丈老於聖
人之學蒙聖天子託子之寄廟堂遜於官僚之擇誠可
謂當人之舉某所見如此不得不告攷宋史光宗紀乾
道七年立爲太子慶王愷爲雄武保寧軍節度使判寧
國府進封魏王此書正以爲王府司馬致賀魏王光宗

兄故以太伯爲況則王府之命當在七年秋冬其言擇於官僚亦公嘗爲太子侍讀之證也又攷魏憲惠王傳淳熙元年徙明州則王判寧國蓋首尾三年公爲司馬又在魏王到鎮之後又先以自劾去其在寧國蓋當乾道八年書末又云丈在閩中門庭之廣得人有幾則又詢其提舉福建時所得人才亦可見其禮賢好士之概卽何叔京碣所謂名好士也又按浪語集與陳君舉書云四三哥却有典午之命似舍驥勿乘矣公在鄭氏諸從中次第蓋在四十三而典午者司馬也以監司除王府屬官不爲美遷故有此語

上魏王書言謙德未光不聽自劾免改江西提刑未行乞祠

以歸

姓譜魏王判宣州南面受屬吏謁幕府進劄子亦坐而
可否之及伯熊除府司馬遂以劄子開說謙德未光嫌
疑之際或駭觀聽姓譜繫吏部郎官於此下誤萬厯志魏王判宣州
除司馬以劄子開說謙德未光不聽遂自劾免改江西
提刑奉祠學案攷陳亮龍川集十五送叔祖筠州高安
簿序某之師友永嘉鄭公朝暮來持憲節按筠州今江
西瑞州此卽郡志學案所謂自劾免改江西提刑也今
江西通志職官無鄭公名或未上卽以奉祠歸歟

起知婺州

康熙金華府志職官知婺州軍鄭伯熊宣熙二年由奉

議郎任按公去寧國在乾道九年其起知婺州亦以家居被命而於淳熙二年至婺也

淳熙三年秋召赴闕尋除國子司業

龍川集二十七郎秀才翥墓誌銘淳熙三年秋鄭婺州召還約其弟迓母括蒼而語其屬邑之民永康陳亮曰我必取道龍窟以趨行在所按公弟卽景元蓋公母在婺以將赴闕送母歸温州而約其弟來處以迓之乃造於朝故有取道龍窟以趨行在之語

呂祖謙東萊集與周丞相子充書鄭景望之去邦人甚去思然此公論正而氣和還朝必有裨益但未知處之如何耳

按周益公淳熙十一年始爲相此書在景望初召還時不應卽稱丞相蓋後人編集時追改

又按東萊集與潘叔度書景望入學舊觀浸還蓋自婺州奉召時尙未除官不久卽爲少司成矣

周必大平園續稿二十六敷文閣學士李文簡公燾神道碑力請變文體取實學以致人才上袖公奏付三省下學官議國子監司業鄭伯熊等請如公言按碑先言四年春駕幸太學命公執經四年爲淳熙丁酉則公爲少司成蓋在三年丙申冬其時甫自婺州召還也姓譜失書知婺州及自婺州召爲少司成一節而學案乃謂由婺州入爲吏部郎官兼太子侍讀歷國子司業志稿亦繫司業於太子侍讀之後皆爲失攷

止齋集張忠甫墓誌銘景望三入朝二十餘年其卒也

位不過九卿三入朝謂初召永國子繼除著作佐郎及後自婺州召爲少司成也

淳熙四年七月兼國史院編脩官

淳熙四年九月遷宗正少卿仍兼國史院編脩官

中興館閣錄八國史院編脩官淳熙以後鄭伯熊四年七月以國子司業兼九月爲宗正少卿仍兼

淳熙五年除直龍圖閣知監國府

水心集十二歸愚翁集序景望徇道寂寞視退如進官至宗正少卿而止按書錄解題言公至少司成宗正少卿嚮用矣每少不合輒乞去水心祭鄭龍圖文云官雖不爲賤而未得要地以建明蓋宋時常由侍從得執政

由卿監得侍從官至宗正可以游登從列而每以不合
乞去故以卿貳終也又按宋史職官志二直龍圖閣祥
符九年以馮元為太子中允直龍圖閣之名始此凡館
閣之久次必選直龍圖皆為遷待制之基也中興後凡
直閣為庶官任藩閫監司者貼職各隨高下而等差之
貼職猶今之
督撫兼銜又云龍圖閣大中祥符中建以奉太宗御
書御集有學士直學士待制等官又云直龍圖閣寺監
掌貳補外謂出守或領監司提刑提帥臣宋時州有軍額
則除之而公由宗正卿出守則寺貳也寺監掌貳其官
已崇故外補時

復加館閣貼職以示寵異
乾隆甯國府志職官上宋知府事鄭伯熊字景望永嘉

人開治學舍市官書二千卷聚生徒至二百人又職官表
淳熙五年任七年代去蓋首尾二年

淳熙七年甯國秩滿歸永嘉尋除知建寧府

袁燮繫齋集十五通判平江府校書郎姚君穎行狀淳熙五年廷對第一授承事郎簽書寧國軍節度判官又云七年奉二親之官太守龍圖鄭公伯熊鉅儒也一見契合遇之良厚秩滿去語君曰親老思鄉滿則罷罷則歸雖丐祠之請亦不至於廟堂君聽其言亟以書白魯公具道之且曰首當爲言於上使以達官榮其親甚於里居之樂其親也按行狀穎以淳熙八年召對除校書郎改倅平江而鄭公先在寧國又先以秩滿去則其知

寧國實在淳熙五六年又可知其去寧國時未移官

之命也

學案言移知建寧亦微誤

東萊集與朱子書云鄭景望自寧

國過此渠亦是未滿前年歲間不曾通政府書直至細

滿

猶今言實滿蓋宋時俚俗語

亦無問正與姚穎行狀所言合或宰

相爲之言乃復知建寧耶魯公王淮也

龍川集二十七郎秀才

翦

墓誌銘孤出鄭公之書曰是

從寧國以三萬贖我又云夏五月鄭公還永嘉余與徐

元德居厚候之館頭按誌翦卒於淳熙五年正月其子

景明以免喪之年冬十一月將葬乞銘於同甫當在七

年所云夏五月鄭公還永嘉蓋由寧國歸以五月過永

康也

徐元德亦永嘉人增於永康遂僑居焉館頭蓋永康郵次

又按水心集送鄭丈

赴建寧詩云兩地旌旗一閩中十年監牧九卿崇公以
淳熙五年出守寧國至七年復知建寧首尾三年所謂
一閩中也又有句云遙知獨上千山路處處梅花逐暖
風止齋集送鄭少卿景望知建寧第一首末句云新茶
可擷英蓋公守建寧以七年冬間拜命八年春初上道
而抵任當在採茶時矣故二公贈詩如此止齋又有句
云過家鄉里敬將母士夫榮過家卽同甫所謂歸永嘉
將母則與太夫人同行也又止齋兼送景元一章首句
云海內言華萼誰名動搢紳末二語云公餘如促鄰
把古書陳蓋景元亦同行也

爲之跋見朱
子集八十一

公卒時景元嘗有書報朱
子言其臨終不亂而朱子

同治福建通志九十二宋職官知建寧府鄭伯熊
間任

淳熙八年以疾卒於建寧

陸游渭南集三十四知興化軍趙彥真墓誌銘郡守鄭公伯熊知君最深有疾不以郡事屬其貳而言於使者請檄公攝守疾革獨延公至卧內屬以草乞致仕奏

朱子集八十一跋鄭景望書呂正獻公四事云右申國呂正獻公四事見其家傳而故建寧太守鄭侯書齋壁以自警也侯此時已屬疾間不兩月而終啟手足時清明安定執禮不懈如常日又云其爲此邦號令條教必本於孝弟忠信學者傳之按公守建寧甫及半歲其建

明它無所見於此二則可以見其大畧又按是年七月

金華呂伯恭亦卒

東萊年譜卒於消黑八年辛丑七月二十九日

而其與朱子

書有景望不起之語則鄭公之卒先於伯恭蓋在是年夏間又按龍川集二十二祭鄭龍圖文云丙午之夕我將哭吾亡友於金華銜冤籲天謂天不明癸卯之朝誰尸死生黑頭如麻獨我良朋哀哀不寐躑躅而行爲此邂逅恍若銘旌問其前驅來自建寧嗚呼噫嘻得非吾鄭先生之靈耶又云去年之夏舉酒相屬旅舍依然不知今日之酌公於冥冥也蓋同甫往哭伯恭而鄭公歸櫬適過金華舉酒相屬卽郎秀才墓誌所謂與徐居厚候之館頭也又止齋集哭呂伯恭郎中舟行寄諸友云

去年上溪船落日建安旄今年上溪船露滯金華軍
當在淳熙九年伯恭已葬而止齋哭之墓上也

是年秋公弟伯英以喪歸葬於永嘉清通鄉證覺院後山鄭氏先世塋也

書錄解題但言卒於建寧府

姓譜溫州府志永嘉志皆言卒於溫國失攷

不

言有諡及贈官姓譜郡邑志皆云卒諡文肅亦不言贈官按吳子良林下偶談云鄭敷文大儒也名伯熊朱子語類云黃義剛問鄭敷文所論甫刑之意今敷文鄭氏書說其書具存放宋史職官志諸閣有敷文閣學士直學士待制直閣等官公由宗正少卿除直龍圖閣出守或以致仕恩例加贈敷文閣待制故有此稱又鄭公卒

時得年若干不可攷水心景元墓誌景元以紹熙三年

卒年六十三而公先十一年卒蓋甫五十三四陳太恭

人墓誌云先是伯英葬龍圖於清通鄉證覺院北山而

坎其中央爲壽藏今以葬則公蓋祔葬母墓鄭氏家譜

謂鄭氏祖墓在永嘉四十一都證覺院後左側山麓蓋

卽龍圖葬處又郡邑志不詳二鄭所居水心陰陽精義

序云鄭氏園佳城南林下偶談云木尙書待問造宅侵

鄭氏地則其居在城南而與木爲鄰也

姓譜鄭伯海傳
家居立義塾

師訓生徒五百餘人至今名其里曰學堂
前距文肅公百餘步人謂之東西二鄭又按公有子

四人陳太恭人墓誌云孫男脩職郎耆仁亦先卒次志

仁由仁處仁爲仁好仁求仁將仕郎曾孫男台僧公盥

充耘圓僧止齋集承事郎潘公墓誌云二女孫長適直
龍圖故宗正少卿鄭公伯熊第四子處仁又分韻送王
得脩詩序云鄭志仁字能之能之與叔父伯英字去華
則以故龍圖先生嘗客德脩於宣城以伯英爲叔父則
志仁亦景望子而景元二子爲仁求仁見水心所作墓
誌則耆仁由仁蓋亦公出惟好仁不知爲誰子耳據陳太恭
人墓誌公尚有所著書有集三十卷有六經口義拾遺
弟伯海伯麟有蘊語有紀綱又有書說雜著同甫有景望書說序維
存其從學弟子曰陳傅良蔡幼學朱伯起木待問黃巖
應恕永康郎翥

宋史陳傅良傳伯熊於古人經制治法討論尤精

通學彙編卷十二
水心集温州學記鄭景望出明見天理神暢氣怡篤信
固守言與行應

歸愚翁集序大鄭公恂恂少而德成經爲人師深厚惻
惻無一指不本於仁義無一言不關於廊廟 景望徇
道寂寞視退如進

祭鄭景望龍圖文惟公順正靜密夷曠粹沖不違其心
不褻其躬出處進退潛涵顯融謗譽不及庶幾中庸此
愚不肖謂如公者可以繫天下之望而待萬物之會通
浪語集答葉適書王梅溪之方正鄭著作之沖養皆吾
黨之望

周必大省齋文彙跋鄭景望詩卷言道學者薄詞章近

世則然景望龍圖通經篤行見爲儒宗而其詩句乃純有晉唐名勝之風胸中所養亦可知矣

樓鑰攻媿集祭鄭龍圖文德量淵澄而不見其涯渙性質玉粹而不勞於琢磨其形於文也渾然天成而上軌於周漢其進於道也怡然理順而深探於雄軻與之游如在春風之中登其門如入泰山之阿是非至明而涵容不顯其迹進退至切而從容不見其他至於莅官則有不惡而嚴之風憂世則有哀而不傷之意發而中節茲又皆其所以爲至和者也

龍川集祭鄭少卿景望文師儒輔導之官舉天下皆以爲莫宜於公而公亦庶幾出其一二以上論三代之英

及舉手之少異已多言之足懲雖去國之不較寧有志
之竟成將所存之高而事不下接抑道之興廢不可以
人事爲憑耶

鄭景望雜著序公之行己以呂申公范滂夫爲法論議
以賈長沙陸贄爲準而惓惓斯世若有隱憂則又學於
孔孟者也

氣直而筆曲中間踈古簡厚者尤多謂近震川震川不足駭之
漢下村居記乃極似震川然亦未嘗不似孫可之也送何
國敘言夷務第二疏密陳夷務疏澄懷十友圖記愛日堂記
乾州楊氏族譜序永康縣學碑記義理充足根本盛大必非
近時所有非特波瀾意度不異於古人亦學術之正也同治
戊辰秋八月初三日許宗衡識於宣武城南我園之意隱齋

遜學齋文鈔跋

右遜學齋文鈔十卷余友孫琴西廉訪著也琴西籍瑞安與金華毗連而吾邑永康又舟車孔道以故琴西自膺道光丁酉選拔及庚戌通籍入翰苑每省試北上必過吾鄉余雖早耳琴西名以未得一見爲恨咸豐乙卯余赴都始晤琴西丙辰供職兵曹朝夕過從質疑問難友而兼師用是與琴西益親同治紀元君出守安慶權廬鳳嶺道甲子奉諱旋里余亦以丁母艱歸道出婺郡聚晤旬日別後不相聞者殆將十年去冬游白下下榻君官廨剪燭話舊倒樽論文夜恒至午弗休余出舊作就正辱贈弁言今春君入覲而余復郵詩以送蓋余與琴西文字之緣深矣君詩十卷已梓行茲復囑刻是

集因得盡讀其文夫文者載道之器自非裏忠孝貞廉之性而又沈浸於經史磨礪於世故與夫上下古今理亂得失之由一皆貫徹於吾胸則其發而爲文者縱抽祕騁妍窮極工巧徒震耀庸俗人之耳目而已要於道術無關也讀琴西集無論闊篇短幅必寄意深遠於世道人心足相維繫凡一切酬應及世俗導諛獻媚之詞湔洗殆盡斯不愧載道之文矣或謂琴西文似熙甫似望溪惜抱余獨以謂是數公者何足以限琴西琴西之文嚴潔而淵懿蓋上以追步子長而下則希踪班范也世有知言當不以爲阿好同治癸酉二月永康胡鳳丹跋於鄂垣之退補齋